

KHAMIS 12 MAC 2009

UTUSAN MALAYSIA • MUKA 7

Dalam Negeri

UniKL universiti usahawan pertama

Oleh MOHD. RAFIE AZIMI
rafie.azimi@utusan.com.my

KUALA LUMPUR 11 Mac — Kementerian Pembangunan Usahawan dan Koperasi (MeCD) berhasrat untuk menjadikan Universiti Kuala Lumpur (UniKL) sebagai universiti usahawan pertama di negara ini.

Timbalan Menterinya, Datuk Saifuddin Abdullah berkata, pemilihan UniKL itu adalah sebagai perintis kepada program untuk melahirkan lebih banyak universiti usahawan di negara ini.

"Kerajaan serius dalam usaha untuk melipatgandakan program ke-usahawanan di universiti.

"UniKL akan menjadi perintis kepada program ini dan perkembangannya akan dipantau. Jika berjaya, pakej ini akan dicadangkan kepada institusi pengajian tinggi awam (IPTA) lain untuk diaplikasikan," katanya.

Beliau berkata demikian pada sidang akhbar selepas merasmikan Pusat Informasi Keusahawanan UniKL (Pastiku) Kampus Kota, UniKL di sini hari ini.

Pada majlis itu, UniKL turut menyerahkan memorandum perjanjian (MoA) dan surat hasrat (LOI) kepada rakan-rakan strategik terdiri daripada MIMOS, SME Bank, Kolej Safa, Institut Kemahiran Safa dan



SAIFUDDIN Abdullah menyaksikan pertukaran dokumen antara Dr. Hakim Juri (kanan) dan Dr. Latiff Awang pada majlis merasmikan Pusat Informasi Keusahawanan UniKL Kampus Kota, di Kuala Lumpur, semalam.

Island College Technology.

Turut hadir Ketua Pegawai Eksekutif UniKL, Datuk Dr. Hakim Juri dan Ketua Eksekutif Kolej SAFA, Datuk Dr. Latiff Awang.

Mengulas mengenai pemilihan UniKL, Saifuddin menyifatkan universiti itu seakan-akan sudah mempunyai satu pakej lengkap untuk dibangunkan sebagai universiti usahawan.

"Visi UniKL untuk melahirkan 'teknopreneur' (Usahawan yang mahir dengan teknologi), selari dengan hasrat MeCD untuk melahirkan lebih ramai usahawan berjaya.

"Selain itu, mereka turut mempunyai pelbagai kemudahan berkaitan keusahawanan seperti dewan perniagaan siswa, majlis alumni perniagaan dan yang terkini, Pastiku," jelas Saifuddin.